

Prome exposicion di intercambio internacional a keda habri na Museo Arkeologico



ORANJESTAD - Como un acontecimiento historico pa Museo Arkeologico Aruba (MAA) a wordo considera e apertura di e prome exposicion di intercambio internacional, “esta “Putchipu’u, El oficio de la palabra entre los Wayuu” diabierna ultimo.

E acto aki a conta cu presencia di Gobernador di Aruba, Sr Fredis Refunjol, Minister di Cultura sr. Otmar Oduber, miembronan di cuerpo Consular na Aruba, representantenan di e comunidad Wayuu na Aruba, y publico en gener-

al. Minister Oduber a bisa cu e apertura di e exposicion aki dedica na e ofishi tradicional di indjan Wayuu, tabata un acontecimiento historico, ya cu ta habri un porta pa intercambio di coleccion internacional di Museo del Oro na Bogota, Colombia.

El a laga sa cu e expo ta bira un di e prome nan di e tipo di intercambio aki locual el a felicita tur persona envolvi den e proceso aki. Minister Oduber a referi cu e acto aki a inicia un par di aña pasa cu e bishita di Prome Minister sr. Mike Eman y un delegacion na La Guajira pa concretisa e



acontecimento aki.

Minister Oduber a bisa cu nan a bin cu e expo aki ya cu e tin un link cu e colonia Wayuu caminda un grupo considerabel di nan ta biba na Aruba, y tambe e Arubianonan cu a yega di biba den e region Guajira. E ta un exposicion temporario cu ta inclui 23 panel unda ta wordo destaca e funcion di e “Putchipu’u” of “Palabrero”

kende ta fungi como mediador pa resolve conflicto entre partido.

E mandatario a señala cu comunidad Wayuu no tin hues y tampoco cuerpo policial, sino cu nan ta apunta e persona aki cu ta intermedia y papia. El a bisa cu e expo aki ta referi na un balor hopi importante di tur humano y no exclusivamente di e Wayuu. “Nos tur por siña y corda cu esaki ta e forma cu tabata den tempo di indjannan, hopi yega na Arawak tambe cu tabata na Aruba, cu ta traves di dialogo y combersacion, nan ta termina te dia di awe tur su disputanan”, el a bisa.

